

Die Vereine sinn die Seel vonem Städtche

Omm Sunndaachnoochmiddaach hawwe merr uffem Weihnachtsmarkt widder emol unsern alde Freund Hubert getroffen. Noochdem mir uns kräfdisch die Händ geschittelt hadde, habb ich enn gefroocht: Ei Hubert, ich habb dich joo schunn long nimmi geseh? Warsde onn Kerb nit in Flerschem?

Nein, hotter ze Antwort gewwe, ich war das ganze Jahr noch nicht in Flörsheim, nicht an Kerb und auch nicht am Sommerfest.

Ich war gonz baff. Unn warum nit, hosde was geeche Flerschem?

Aber nein, sächt de Hubert. Ich war lange krank, mich hatte es ganz schön erwischt. Aber ich bin die ganze nächste Woche hier, können wir uns mal sehen? Dann werde ich euch erzählen was ich so alles hinter mir habe in diesem Jahr.

Ei ja, hott moi Fraa gesaat, dann kimmsde mol owends zum Esse bei uns vorbei unn später drinke merr e schee Fläschje Woi sesomme. Ruf awwer enn Daach vorher oo.

Unn ich saach: Komm, jetzt gehn merr erst emol ooner drinke.

Ebbes denooch, wie jeder von uns e Glas Glühwoi in de Hond hadd, hott de Hubert gesaat: Ich habe euch vorhin beobachtet. Wie viele Leute ihr kennt und wie viele euch kennen – das ist doch schön, oder?

Ja, saach ich, dess iss dess Scheene omm Weihnachtsmarkt, dass merr sich widder emol sieht. Merr frächt wies oom geht unn was die Kinner unn Enkel mache, wo se jetzt sinn unn obse onn Weihnachte mol kumme, so Sache halt.

De Hubert sächt: Ich kenne ja nur noch wenige Leute und nur wenige Leute kennen noch mich. Das ist ja auch kein Wunder, wenn man sieht, wer alles auf eurem Weihnachtsmarkt vertreten ist. Da sind ja viele Vereine dabei, die hat's zu meiner Zeit noch garnicht gegeben. Und überall ist Betrieb, vor jedem Stand drängen sich die Menschen, überall reden die Leute miteinander, sind fröhlich und lachen. Schön sowas.

Ja, saach ich, unn vor dene Leit in dene Ständcher muss merr Hut unn Kappe ziehe. Unn vill von dene sieht merr garnit, dess sinn die, die die Ständ uff unn später widder abbaue, die Esse und Trinke organisieren, Käste von Zeich ebeischleppe, deferr sorche dass ess Feier unner de Werrsch nit ausgieht odder die was reparieren wenn ebbes kaputtgieht, unn die mache dess all, weil ihrn Verein widder emol e bissi Reklame ferr sich mache will unn weilers Geld, was iwwerich bleibt, entweder ferr ebbes Neies brauche odder es ferr enn gude Zweck verwenne dut.

Moont de Hubert: Ich bewundere die Leute, die stundenlang Bratwürste grillen, Glühwein machen und ihr Publikum bedienen. Da muss man für seinen Verein schon eine Menge übrig haben, vor allem bei diesem Wetter.

Hubert, saach ich, die Vereine sinn die Seel von jedem Städtche. Mett Idealismus unn mettere gud Kameradschaft unnernonner halle die all sesomme wie Pech unn Schwefel. Unn sie dun vill ferr die Kultur mett Veroostaltunge unn so. Obwohl – die Alde sterwe eweck unn die Junge dun sich schwer, in die Vereine oizetrete. Awwer mehr Beitrach kenne die heitzedaach nor schwer nemme. Die Leit misse rechene.

Doo sächt de Hubert: Aber an Unterstützung für die Vereine ist hier in der Stadt doch kein Mangel, oder?

Naa, saach ich, ich glaab nit. Weil wennde sooner Stadt die Seel erausreißt dust, dann sterbt se. Eiern Honnes